

Hentikan politik dalam persatuan sukan

DB 11.8.2019 8

KOTA KINABALU: Budaya politik dalam persatuan sukan di negeri ini perlu dihentikan.

Menteri Belia dan Sukan Sabah Phoong Jin Zhe berkata ini perlu untuk mengembalikannya semula kegemilangan dan penguasaan Sabah dalam arena sukan kebangsaan.

"Sebelum ini kita lihat dalam persatuan mahupun peringkat daerah, terlalu banyak politik. Jurulatih dan atlet tidak baik, jurulatih dan persatuan tidak baik, mahupun jurulatih dan kerajaan negeri tidak baik.

"Banyak perkara seperti ini berlaku. Oleh itu, mari kita berbalik pada suasana sukan yang sebenarnya, semangat kesukanan sebenar.

"Kita menilai atlet bukan menerusi perbezaan bangsa, bilangan mahupun nombor, tetapi kita menilai mereka melalui keputusan yang mereka capai.

"Jika kita dapat memansuhkan ketidakadilan dan budaya politik dalam persatuan sukan di negeri ini, saya percaya Sabah mampu mengembalikannya semula kegemilangan dan penguasaan kita dalam arena sukan kebangsaan," katanya.

Beliau berkata demikian ketika melakukan lawatan ke Makmal Prestasi Manusia di Fakulti Psikologi dan Pendidikan, Universiti Malaysia Sabah (UMS) untuk melihat percubaan atlet olahraga Sukan Malaysia (Sukma) negeri pada Jumaat.

Mengenai makmal tersebut, beliau berkata ia merupakan permulaan tahap pertama persiapan negeri menjelang Sukma menerusi kerjasama dengan UMS dalam aspek sains sukan.

"Saya telah melawat dan melihat kemudahan untuk atlet prestasi tinggi yang ada di sini, yang mana boleh melatih dan menganalisa kemampuan atlet selain untuk kita menggariskan apa yang perlu dipertingkatkan menjelang Sukma yang tinggal

kira-kira setahun lagi.

"Kita perlu melakukan ujian secepat mungkin dan memulakan latihan penambahbaikan secara profesional dan saintifik," katanya.

Tambahnya, data analisa ke atas atlet yang diperolehi boleh memantau dan memberi galakkan kepada mereka bukan sahaja dari segi latihan tetapi juga dalam bentuk kebajikan atlet termasuk elaan serta bantuan saintifik.

"Ini penting untuk memastikan mereka terus berada pada landasan terbaik menjelang Sukma.

"Sains sukan merupakan salah satu aspek yang ingin saya dalam dengan lebih terperinci kerana, sejak kebelakangan ini banyak perkara berubah. Sejak saya mengambil alih Kementerian ini, kita menggunakan lebih banyak sains sukan untuk membantu atlet kita.

"Bukan kerana atlet itu mempunyai hubungan baik dengan jurulatih, mereka akan dimasukkan ke dalam senarai akhir. Ini semua tidak sihat untuk perkembangan sukan kita.

"Kita mahu atlet yang benar-benar telah menunjukkan kemampuan mereka, dan mereka selayaknya terpilih untuk mewakili Sabah," tegasnya.

Beliau juga berikrar untuk membantu program itu dari segi kewangan, khususnya, bagi memastikan atlet negeri mendapat kemudahan terbaik sebelum mewakili Sabah ke Sukma Johor pada 11-19 Julai 2020.

"Saya telah mengarahkan Kementerian saya untuk melihat dan meneliti sistem bantuan, perkara melibatkan kewangan dan juga pengurusan untuk memastikan atlet-atlet kita mendapat apa yang seharusnya mereka selayaknya terima, sama ada dari aspek latihan, analisa prestasi, sains sukan dan bantuan-bantuan lain... bukannya politik," katanya.



JIN Tze diberi penjelasan mengenai kemudahan yang terdapat dalam makmal itu.

Tambahnya, Menteriannya berazam untuk memperbaiki kedudukan dan pencapaian Sabah di Sukma tahun hadapan.

"Di Sukma lalu, kita berada pada kedudukan keenam (dengan pencapaian 33 emas, 27 perak, 45 gangsa). Persiapan kita baharu bermula. Sedikit ketinggalan, tetapi kita yakin untuk kembali pada landasan persiapan mengikut perancangan.

"Majlis Sukan Negeri (MSN) Sabah baharu sahaja mengambil alih persiapan atlet dari persatuan. Ini bermakna Kementerian ini perlu menggunakan kewangan tambahan untuk persiapan Sukma, untuk menjaga pelatih-pelatih Sukma kita.

"Pada Sukma Perak yang lalu, kita hanya melakukan persiapan enam bulan, tetapi kali ini kita memperuntukkan lebih masa. Saya meminta semua atlet untuk memberi sepuh tumpuan dalam latihan.

"Beberapa atlet kita juga berada dalam persiapan Sukan SEA sebelum menghadapi Sukma. Sekalipun mereka berlatih dibawah program kebangsaan, kita masih juga melaksanakan pemantauan dan pengurusan mikro," kata Jin Tze.

Sukan SEA akan berlangsung di Filipina bermula 30 November hingga 11 Disember.

"Ini kerana mereka berlatih jauh di Semenanjung Malaysia, mungkin mereka

perlu bantuan kerana ada diantara mereka datang dari keluarga yang miskin. Oleh itu, saya telah mengarahkan kakitangan Kementerian ini untuk kerap merujuk, melihat apa yang mereka perlukan, dan bantu mereka.

"Walaupun kebajikan mereka sepatutnya menjadi tanggungjawab kerajaan persekutuan kerana mereka mewakili negara ke Sukan SEA, tetapi Kementerian ini tidak akan duduk begitu sahaja dan membiarkan kerajaan pusat menjaga segala kebajikan mereka," tambah beliau.

"Dalam masa setahun ini, saya mahu sains sukan dan sikap profesional dilaksanakan dengan telus dan tulus. Saya percaya kita mampu di Sukma kerana kita memiliki ramai bakat," katanya.

"Saya juga bersyukur dengan bantuan dan kerjasama dari pihak UMS dalam membimbing dan melatih atlet Sukma negeri ini menerusi penggunaan peralatan dan kemudahan latihan sukan prestasi tinggi.

"Ada peralatan yang bernilai RM500,000 dan mencecah harga hampir sejuta ringgit untuk satu unit. Jadi bukan mudah (untuk kita memiliki kemudahan seperti ini).

"Oleh demikian, saya amat berterima kasih kita dapat bekerjasama dengan pihak UMS," kata beliau.

"Saya juga telah meminta pihak MSN Sabah dan UMS untuk meneruskan kerjasama ini bukan sahaja untuk Sukma, tetapi juga untuk latihan berterusan atlet-atlet prestasi tinggi negeri ini.

"Selaku menteri, saya harus memperjuangkan apa yang diperlukan oleh atlet-atlet negeri ini khususnya dalam mendapatkan peruntukan kewangan yang lebih dari kerajaan negeri. Anak-anak ini memerlukan bantuan sebaiknya, dan kita perlu membantu mereka," ujarnya.